

IDAZLE BILBOTARRAREN INGURUKO ERAKUSKETA ETA JARDUNALDIAK EGINGO DIRA BILBON ETA DONOSTIAN

Gabriel Aresti gure artean

■ Datorren astean *Gabriel Aresti*.

Idazle, euskaltzale, plazagizona erakusketa irekiko da Bilbon, eta urrian Donostian izango da

■ Arestiren inguruan 1986an

egindako jardunaldietako aktak liburu batean eman ditu argitara Bidebarrieta Kulturguneak

■ Idazle bilbotarraren lana eta

nortasuna aztertuko dituzte heldu den urrian Bilbon eta azaroan Donostian

Montse Arregi / Bilbo

DATORREN urtean beteko dira 25 urte Gabriel Aresti hil zela, baina ez da ordura arte itxaron behar haren omenezko ekimenak loratzen hasten ikusteko. Egunotan liburu bat argitaratu da, erakusketa abiatzeaz da, saiakera lehiaketaren deialdia irekita dago eta jardunaldiak prestatzen ari dira urrirako.

Gabriel Aresti idazlea, pertsona eta bere lana izango dira ekimenon ardatza. Bilboko Bidebarrieta Kulturgunean idazlearen inguruko liburu bat aurkeztu zuten atzo —1986an Arestiri buruz egindako jardunaldien emaitza da—. Ekitaldi berean datorren astean bertan inauguratuko den erakusketaren berri eman zuten antolatzaileek, eta baita urrian zein azaroan egingo diren jardunaldien berri ere. Bestalde, Arestiri buruzko saiakera lehiaketan parte hartzeko epea otsaila arte izango dela zabalik iragarri zuten.



MIKEL MARTINEZ

Antolatzaileek atzo aurkeztu zituzten Bilbon Arestiren inguruan egingo diren ekitaldiak.

Erakusketa, «batez ere didaktikoa»

Gabriel Aresti. Idazle, euskaltzale, plazagizona erakusketa ekainaren 4tik urri arte izango da Bidebarrieta Kulturgunean, eta gero Donostiako Koldo Mitxelena Kulturunera eramango dute. Datorren urtean zehar, gainera, herri eta auzoetako liburutegietara eraman nahi dute. Ikus-entzuleria zabalari bideratutako erakusketa antolatu dutela esan zuen atzo Jon Kortazar komisarioak. Idazle, irakasle eta literatur kritikariaren esanetan, «batez ere didaktikoa da, ez da espezialistentzako erakusketa bat, adin eta mota guztietako jendeari bideratutakoa baizik».

Bidebarrieta Kulturgunearen eta Koldo Mitxelena Kulturgunearen arteko elkarlanaren emaitza da erakusketa. Berau osatzeko Arestiren senitartekoen laguntza «ezinbestekoa» izan dela esan zuen Kortazarrek. Erakusketan hari buruzko ikuspegi «pertsonala» eman nahi dela gaineratu zuen.

«Erreferentzia» den liburua

■ GABRIEL ARESTI-Ren lanari buruzko hainbat ikuspegi eta bere nortasuna ezaugarritzeko hainbat datu eskaintzen ditu argitaratu berri den liburuak. *Bilbok bere seme prestuari* izenburupean Gabriel Arestiri buruzko jardunaldiak egin ziren 1986an Bilbon, eta orduko aktak biltzen ditu Bidebarrieta Kulturguneak eta Bilboko Udalak argitaratutako liburuak.

Orduko hitzalaldiak eta mahai-inguruak jasotzen dituen lana «hausnarketarako erreferentzia» dela

nabarmendu zuen atzo Joseba Agirre-azkuenaga Bidebarrieta Kulturguneko arduradunak. Datorren urtean Arestiren heriotzaren 25. urteurrena beteko dela eta, haren lanaren inguruan hausnartzeko une egokia dela esan zuen.

Besteak beste, Anjel Zelaieta, Karmelo Landa, Juan San Martín, Sabina de la Cruz, Juan María Aresti, Dionisio Blanco, Rafael Castro, Agustín Ibarrola, Agustín Zubikarai, Alfontso Irigoien, Xabier Kintana edota Aita

Onaindia izan ziren jardunaldiotan parte-hartzaileak.

Joakin Gallastegi izan zen jardunaldi haien koordinatzailea, eta Andolin Eguskitza, berriz, mahai-inguruetako moderatzailea. Euskal Idazleen Elkarte-buruak atzo gogorarazi zuenez, «lan erraza eta bihotzez egindakoa» izan zen jardunaldietan parte hartzea. «Aresti maite nuen eta asko ikasi nuen berarengandik», aitortu zuen Andolin Eguskitzak berak. Euskal literatura modernoan «sortzaile nagusi-

sietakoa edo nagusia» izan zela uste du Eguskitzak, eta euskal literaturaren kalitate-prozesuan ezinbestekotzat jotzen du.

1986ko azaroaren 10etik 14ra bitartean egin ziren jardunaldiak, eta horien kariatara kontzertu-errezitaldia egin zen Arriaga Antzokian urte hartako abenduaren 26an. Egun horietan esandakoak jasotzen dituzten aktak Jon Kortazar idazleak berrirakurri eta zuzendu zituen 1990ean, baita hainbat ohar sartu ere.

Erakusketaren inaugurazioak bat egingo du Bilboko Liburu Azokarekin —datorren astean izango da—. Antolatzaileek gaurkotatzea eman nahi izan diote horrela erakusketari.

Bestalde, Joseba Intxaurrek Bilboko Kultura zinegotziak atzo bertan jakinarazi zuenez, Bilboko idazleen liburuak bilduko dituen *standa* jarriko du aipatu azokan Udalak.

Saiakera lehiaketako izen ematea zabalik

Urrian Bilbon eta azaroan Donostian egingo diren jardunaldiei buruzko informazioak ez zuten eskaini atzokoan, ekimenok oraindik prestaketa-prozesuan baitaude. Bilboko Udalak eta Bidebarrieta Kulturguneak bigarren antolatutako duten Miguel de Unamuno Saiakera lehiaketan, berriz, aurtengo gai bakarra Gabriel Aresti bera izango da. Parte hartzaileek datorren otsaila arte izango dute beren lanak aurkezteko.

Erakusketaren xede nagusiak «zabalkunde lana egitea eta material ezezagun eta garrantzitsua plazaratzea» lirateke, Jon Kortazar komi-

sarioaren arabera. Datorren astean inauguratuko den ekitaldian argazkiak, eskuizkribuak, Gabriel Aresti idazleak zentsurarekin izan

zituena harremanen lekuko diren dokumentuak, eta beste hainbat objektu eta liburu ikusi ahal izango dira.